



## Po nalogu Tužiteljstva BiH

# UHAPSENO OSAM OSUMNJIČENIH ZA RATNE ZLOČINE

Jučer ujutro pripadnici Agencije za istrage i zaštitu (SIPA), po nalogu Tužiteljstva BiH, na području Rogatice i okoline lišili su slobode osam osoba osumnjičenih da su za vrijeme agresije na BiH počinile kazneno djelo zločina protiv čovječnosti na području Rogatice. Po nalogu Tužiteljstva BiH, slobode su lišeni Radomir Marković (22.6.1954), Mile Kušić (7.1.1971), Dragan Božović (19.3.1968), Saša Perković (14.10.1971), Radomir Gluhović (7.1.1964), Pero Radović (16.5.1963), Ilija Vukašinić (14.9.1961) i Miloš Vukašinić (1.3.1968), svi rođeni u Rogatici.

Osumnjičeni su da su u okviru širokog i sistematičnog napada, usmjerenog protiv bošnjačkog stanovništva na području Rogatice, kao pripadnici snaga VRS-a, u septembru 1992, naoružani automatskim oružjem, progonili bošnjačko civilno stanovništvo iz više sela, uključujući sela Vragolovi, Golubovići i Karačići. Optuženi su, saopštilo je Tužilaštvo BiH, progonili civile, pljačkali imovinu, a kada su u jednog garaži na području sela Karačići pronašli oko 20 civila bošnjačke nacionalnosti, među kojima je bilo žena i djece, koji su se tu sakrili bježeći od napada, premjestili su ih u obližnju štalu, gdje su zatvoreni, nakon čega je optuženi Mile Kušić pucao rafalno iz automatskog oružja na ove osobe sa namjerom da ih usmrti, te su tada ubijene sve zatočene osobe. Štalu je zahvatio požar, pa su na toj lokaciji na zgarištu pronađeni ostaci tijela četiri osobe, a za tijelima ostalih žrtava još se traga.

Ilija Vukašinić je prilikom napada na Kramer-Selo (općina Rogatica) izdvojio i usmrtio jednog



muškarca bošnjačke nacionalnosti, a optuženi Kušić pucao iz automatskog oružja u noge jednom muškarcu bošnjačke nacionalnosti, zahtijevajući da mu preda zlato i dragocjenosti. Optuženi Kušić, Ilija Vukašinić i Saša Perković terete se da su nakon što su nezakonito lišili slobode civile iz mjesta Kramer-Selo i Raktinica, natjerali ih da se kreću prema naselju Han-Stjenice i zgradi osmogodišnje škole, te tom prilikom odvajali muškarce od žena i djece, nakon čega su žene i djeca protuzakonito zatvoreni, a veći broj muškaraca ubijen, čija tijela do danas nisu pronađena. Nakon ispitivanja osumnjičenih, postupajući tužitelj će odlučiti o pokretanju prijedloga za određivanje mjere pritvora. I SIPA je na jučer održanoj konferenciji za novinare potvrdila da je jučer ujutro u Rogatici uhapsila osam bivših pripadnika Vojske Republike Srpske osumnjičenih za zločine protiv čovječnosti.

**A. B.**